

حي العميان

إدهن قلب نهارك عتمة
حسس نفسك إن الإسود
جوة الرؤية بقى شفاف
بعد ما خطف البرق ف لحظة
كل الضي الساكن عينك
وبقيت أعمى
وانت مصدق
إن الضلمة دي تبقى النور
وانك قادر ترسم لون
غير كوكتيل الصورة زمان
أبيض حالك وإسود حالك

بس أستنى
خلي الباب مفتوح على حاجة
مش محتاجة تشوفها الناس
إفرض فيها حدود الرؤية
ندي جبينها من الدمعات
وانسى تماما أو إتناسى
إن حاجاتك مش مشروعة
والصرخات بالآهة الساكنة
كل حياتك مش مسموعة
ألمك نزفك من جواك
ضحكك ساخر من أحوالك
لما بتهدي طريق للأعمى
وانت بتوصف وبيتشكر
وبيدعيلك يسلم نظرك

صدق نفسك

إن النار جواك بتنور سكك الناس

يمكن لما تموت هيقولوا

زي الشمعة ضحى بنفسه

علشان غيره يشوف بعنيه

وإنسى معالم سكنك فيها

إن أساس عنوانك إنك

واحد من حي العميان